

TŪPA REMIMBOYECUA JUAN UPE APOCALIPSIS

Jesucristo yemoporēhisa

¹ Che, Juan, aicuachía mbahe imboaviye pihaiVIPirā pēu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pīpe imboyecua uca āgua güembiguai che recose cheu.

² Che supi eté amombehu opacatu mbahe asepiya vahecuer iyavei amombehu evocoi Tūpa Ñehengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyerogui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovi ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cūríteindar apirēhi vahe avei; siete espíritu suindar avei no, ahe senda rovai yuvinohai vahe,

⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar

sui. Ahe yande raisu iyavei yande pĩsĩro yande angaipa sui vuvĩ pipe,

⁶ iyavei yande rereco mborerecuarã, pahiguã avei no Vu Tũpa upe yande poravĩqui ãgua. ¡Ëgũe tehi imboeteipri tasecoi opĩratasa pipe apĩrẽhi va-herã!

⁷ ¡Esepia, Cristo iva quĩha rese oura curi!

Ahese opacatu ava osepiara yuvĩreco,

yamotarẽhisarer, oicutu vahecuer avei.

Iyavei opacatu tecua ivi pĩpendar ahese oyaseho tẽira yuvĩreco sepiase.

Ëgũe ehi etera curi.

⁸ “Che aico yĩpĩndar iyavei ipandar” aipo ehi yande Yar Tũpa opacatu mbahe mboavaisarẽhi evocoi yĩpĩvé vahe ité, cũriteindar apĩrẽhi vahe avei.

Juan osepia oquer nungar pipe Jesucristo porañetesa

⁹ Che, Juan, pe rĩquehir aico, iyavei che pe nungar Tũpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pãhumi para guasu avĩterve Patmos serer vahesave Tũpa Ñehengagũer mombehusa pipe sui tẽi, Jesucristo recocuer mombehusa pipe sui tẽi avei no.

¹⁰ Acoi yande Yar arĩ pipe Espĩritu povri ve aicose, asendu che raquĩcuei oñehe pĩrata vahe avĩye acoi mimbĩ ñehe

¹¹ aipo ehi: “Eicuachía mbahe eresepia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve,

Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoyase ayemboyere sese ‘¿ava p̄ha oñehe cheu?’ che yapave. Ahese asepia siete tupri vera hi oro apopri,

¹³ iyavei asepia ip̄ahuve mb̄ia aviye tupri ava ité viña, iturucuar pucucuer ipi rupi tupri ité sese, sumb̄icuasa evocoyase oro apopri ipochiha rupi tupri ité oyepota.

¹⁴ Iha morochi inungar acoi mbahe saviyu vahe, inungar avei yesapi ñapirata morochi vahe, sesa evocoyase aviye tupri ité tata rendigüer.

¹⁵ Ipi evocoyase sendi yai eté, aviye acoi bronce ocai vahe horno pipe, iyavei iñehe ip̄iratá iteanga inungar itu riapugüer.

¹⁶ Oacato coti vireco siete tupri yasitata, iyavei iyuru sui osē quise pucu saimbe yoya vahe. Sova evocoyase aviye ari rendigüer ip̄iratá vahe.

¹⁷ Sepia ramoseve, aviapi ip̄ive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yip̄indar ité aico, ip̄indar avei.

¹⁸ Aicove vahe ité; yepe amano viña, cūritei rumo aicove iri ndopai chivaherã ité aico. Che areco che mborerecuasa ava recocuer mocañi ãgua.

¹⁹ Sese eicuachía co mbahe eresepia vahe: cūriteindar oime vahe mbahe iyavei mbahe oime vaherã curi.

²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rãrosar;

evocoyase vera hi oro apopri, ahe yuvirecoi siete tupri tecua pipendar che reroyasar” ehi.

2

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

¹ “Eicuachía Tūpa rembiguai Efeso pendar che reroyasar rãrosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu:

² Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vaherã. Pesecoãha avei ava, ore apóstol oroico, ehi tẽi vahe; ipare peicua iporombopa tẽisa yuvireco.

³ Che aicua peñemosañõ peyemombaraisu peico che raisupave; ndapecuerai eté ipipe.

⁴ Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar.

⁵ Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tūpa upe; peyeaisu iri catu inungar yipindar. Anise ayevira pẽu, arocuapara pe vera hi senda sui acoi ndapeyeviise Tūpa upe.

⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté.

⁷ ¡Acoi osendu pota vahe, toyapisacañõ Espiritu omombehu vahe rese opacatu che reroyasar upe! Acoi oyemoviracua vahe mbahe-mbahe tẽi apoẽhi ãgua, itohu amondora ivira ha tecovesa resendar

oime vahe teco orisave che Ru piri, ehi' erera icuachía chupe.

Ñehesa Esmirna pendar upe

⁸ “Eicuachía avei Tũpa rembiguai Esmirna pendar che reroyasareta rãrosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pẽu aipo ehi:

⁹ Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tẽi vahe, ore Tũpa rembiporavo judío oroico, ehi tẽi vahe. Ndahei rumo ahe yuvirecoi. Esepia, Caroguar reroyasar tẽi evocoi yuvirecoi.

¹⁰ Ndapesiquiyei chira pe paraisu ãgua sui. Esepia, Caroguar osoquenda ucara amove pe pãhu pendar secoãha ãgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahesa amondora porerecosa tecovesa pẽu.

¹¹ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tẽi apoẽhi ãgua, ahe imanore ihã ndoiporarai chira imoñuviriosa manosa pipe, ehi' erera icuachía chupe.

Ñehesa Pérgamo pendar upe

¹² “Eicuachía avei Tũpa rembiguai Pérgamo pendar che reroyasareta rãrosar upe: ‘Aipo ehi acoi vireco vahe quise pucu saimbe yoya vahe:

¹³ Che aicua pe recosa. Aheve acoi Carugar oguapi oĩ; mborereciar guasu nungar imboyeroyapri secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tēi che recocuer mombehu tuprisar Antipas evocoi tecua Carugar recosave.

¹⁴ Che rumo aicua mbahe pe resendar: eipeve amove ava ndoyepipi potai eté Balaam porombohesa sui yuvireco. Ahe omboaracua Balac israelita mboangaipa uca ãgua, toyuvirohuño mbahe roho seropovēhepri mbahe rahanga upendar tēi, oya, iyavei, toyemboaguasaño yuvireco, oyapave avei.

¹⁵ Iyavei amove ava pe pãhuve ndoyepipi potai eté nicolaíta porombohesa sui yuvireco.

¹⁶ Sese pemboasi pe recocuerai, peyevi Tũpa upe, anise che aso poyava voira pēu, ahese avavara chupe yuvireco che yuru pipe sui osē vahe quise pucu pipe, ehi.

¹⁷ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tēi apoēhi ãgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oĩ, evocoi ava oipisi vahe güeraño oicuará, ehi' erera icuachía.

Ñehesa Tiatira pendar upe

¹⁸ “Eicuachía avei Tũpa rembiguai Tiatira pendar che reroyasareta rãrosar upe: “Tũpa Rahir acoi

vireco vahe güesa inungar tata rendigüer, ipi avei inungar acoi bronze rapipri aipo ehi imombehu:

19 Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú aviye vahe.

20 Oime rumo mbahe pe rembiavi: peñemosañño evocoi cuña Jezabel pe pãhu pendar upe, ahe acoi oñehe tẽi angahu vahe Tũpa rese viña. Ahe rumo ombopa tẽi oporombohesa pipe che rembiguai iyemboaguasa-guasa tẽi uca ãgua sereco iyavei ohu uca mbahe roho mbahe rahanga tẽi upe seropovẽhepri yuvireco chupe.

21 Che amondo vite tẽi ari chupe, tomboasi oangaipa Tũpa upe oyevi ãgua, che yapave viña. Ahe rumo ndopoi potai eté oyemboaguasa tẽisa sui.

22 Evocoiyase cũritei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco.

23 Ipare ayucapara imembri ichui. Ëgüe ehi opacatu che reroyasar oicudara yuvireco che aicua tupri ité opacatu ava pihañemoñetasa iyavei ñepeipei pe yacatu amondora pe rembiapogüer repri pẽu.

24 Pe rumo opacatu Tiatira pendar ndaperoyai vahe co porombohe raisa iyavei ndapeyembohei vahe Carugar suindar aracuasa, ndicuasai yavai vahe, ehi vahe rese, pẽu ndarecoi que ambuae che porocuaita.

25 Peyemoviracuaññora rumo evocoi mbahe pereco vahe rese, acoi che ayevise voi vitu curi.

²⁶ Acoi ava oyemoviracua vahe mbahe-mbahe tēi apoēhi āgua, oyapo vahe che remimbotar mano rupi eté, chupe amondora mborerecuar seco āgua opacatu ivi rupi

²⁷ inungar che Ru ombou che mborerecuarā cheu; ēgüe ehi aveira oporocuai opacatu tecua rupi inungar acoi vara guarepochi, mbahe riapiipa uca āgua, aviyera acoi mahemoinda ñaihu apopri viña.

²⁸ Iyavei amondora yasitata cōhe rerusar chupe.

²⁹ ¡Acoi ava osendu pota vahe, toyapisacaño Espíritu omombehu vahe rese opacatu che reroysar yuvirecoi vahe upe! ehi' erera icuachía.

3

Ñehesa Sardis pendar upe

¹ “Eicuachía avei Tūpa rembiguai Sardis pendar che reroysareta rārosar upe: ‘Acoi ava vireco vahe siete tupri Tūpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tūpa upe nara, ehi pēu viña; omano vahe nungar tēi rumo peico.

² Peyemopoase catu peico iyavei pemonguerēhi catu acoi viroya vite vahe. Esepia, oyepepiipa pota ité yuvireco viña. Supi eté mbahe pe rembiapo che Ru rovaque, ndahei supi tupri vahe.

³ Peyemomahenduha acoi porombohesa peipisi vahe rese; pepoi rene ichui. Peyevi catu Tūpa upe. Ndapeyemopoaseise rumo, asora pēu inungar imonda rai vahe, ēgüe ahera vicho pe resapiha.

⁴ Oime rumo amove ava pe pãhu pendar ndoy-
apoi eté angaipa yuvireco, evocoyase inungar
ava oguata vahe oturucuar morochi vahe rese,
ëgüe ehi aveira ahe güeco maranehi pipe oguata
che rupi yuvireco. Esepia, ahe chupe iya ité.

⁵ Acoi ava oyemoviracua vahe mbahe-mbahe tēi
apoēhi ãgua, ahe sese imondesara turucuar mo-
rochi vahe. Ahe serer namboyehoi chira cuachiar
tecovesa resendar pipe sui, asenoira rumo che Ru
rovai iyavei sembiguai eta rovaque avei curi.

⁶ ¡Acoi ava osendu pota vahe, toyapisacaño
Espíritu omombehu vahe rese che reroyasar
yuvirecoi vahe upe! ehi' erera icuachía.

Ñehesa Filadelfia pendar upe

⁷ “Eicuachía avei Tūpa rembiguai Filadelfia
pendar che reroyasareta rãrosar upe: ‘Co seco
maranehi vahe, supi tupri vahe ité, vireco vahe
mborerecuasa aracahendar mborerecuar guasu
David nungar, acoi omboise que oquenda, ñepei
yepe que ava nomboyai chietera; iyavei acoi om-
boyase, ñepei yepe que ava nomboi chiete aveira,
ahe aipo ehi:

⁸ Che rumo aicua mbahe opacatu pe rembi-
apo. Esepia, che amondo pe rovaque inungar
oquenda imboipri pēu pemombehu vaherã che
recocuer. Ahe que ñepei yepe ava nomboyai chi-
etera yuvireco. Esepia, yepe pe nipirata tuprii
vahe, peroya ité rumo che ñehe iyavei ndacheñomi
eté ava sui peye.

⁹ Co Carugar reroyasar semira tēi vahe, ore
Tūpa rembiporavo judío oroico, ehi tēi vahe,
ndahei rumo ahe eté vahe yuvirecoi. Ahe

amoñenopi hapa ucara pe rovai, toicua yuvireco che pe raisusa, che yapave.

¹⁰ Esepia, peroya ité che porocuita, peyemoviracua ité evocoi mbahe tēi upe peico. Evocoyase che opoepira acoi ari tecoãhasa ouse opacatu ivi rupindar upe curi.

¹¹ Ayevi poyavara. Peyemoviracua catu Tūpa reroyasa pereco vahe rese. Evocoyase ñepei yepe que ava ndovirocuai chietera Tūpa suindar porrecosa pe sui.

¹² Acoi oyemoviracua vahe mbahe-mbahe tēi apoēhi ãgua yuvireco, ahe che Ru piri nara ité yuvirecoira. Ahe evocoyase inungar-ra che Ru Tūpa rēta vīracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piasu, evocoi ou vahe rã iva pendar che Ru Tūpa sui, iyavei che rer ipiasu vahe ité arovara sese no.

¹³ ¡Acoi ava osendu pota vahe, toyapisacaño Espiritu remimombegüer rese che reroyasareta upe! ehi' erera icuachía.

Ñehesa Laodicea pendar upe

¹⁴ “Eicuachía avei Tūpa rembiguai Laodicea pendar che reroyasareta rãrosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tūpa rembiapo, ahe aipo ehi:

¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi tēi vahe nungar peico pe rembiapo pīpe. ¡Ñepei reseve vahe rumo aipota,

ndahei iguayĩ tẽi vahe! Pe recocuer rumo iguayĩ tẽi vahe nungar, sese opomboyevĩñora cheyesui.

¹⁷ Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraisusa che Ru rovaque inungar ndasesapisoĩ vahe peico. Iyavei ndapeyavĩi nditurucuai vahe peico.

¹⁸ Sese opomboaracua; peseca iva pendar oro tatave imoatĩropĩ nungar che sui pe paraisuẽhi iri ãgua che Ru rovaque; peseca avei turucuar morochi vahe teco tupriša peyeupe che suindar nani tupri vahe nungar pipe pe recoẽhi ãgua, pe chĩẽhi ãgua avei iyavei inungar ava oseca mosa güesa upe nara osareco iri ãgua, ãgüe peye aveira.

¹⁹ Che añehe pĩrata seco mohivi ãgua che rembiaisu upe yepi. Peyemonguerẽhi catu, pemboasi ité pe recocuer che Ru Tũpa upe pe yevi ãgua.

²⁰ Esepia, inungar que ava oquenda omotara oquendĩpive ohã viña, ãgüe ahe pe pihave vichico; pesenduse che ñehe, pemboira cheu. Che evocoyase aiquera pe pĩri, yacarura oyepĩri.

²¹ Acoi ava oyemovĩracua vahe mbahe-mbahe tẽi apoẽhi ãgua yuvireco, ahe amboguapi ucara che ipĩve imoi che porocuaisave, inungar che mbahe tẽi reco reroyĩ pare, aguapi che Ru ipĩve vĩte.

²² ¡Acoi ava osendu pota vahe, toyapisacaño Espĩritu remimombehugũer rese che reroyasareta upe! ehi imombehu pẽu' erera icuachía" ehi Jesús cheu.

4

Tũpa mboeteisa ivave

¹ Ipare asepia mbahe inungar oquenda oyemboi vahe ivave. Ahese evocoi ñehesa ipĩrata vahe mimbĩ nungar yipĩndar oñehe vahe cheu, ahe asendu iri: “Eyeupi ave. Che evocoiyase mbahe amboyecuara ndeu mbahe imboaviyepirã curi” ehi.

² Ahe pipeve voi, Espĩritu pĩratasa pipe aico iyavei asepia tenda ivave, ahe iharive ñepeĩ oguapĩ oĩ.

³ Co oguapĩ vahe ndoyavĩi eté ita jaspe porañetesa iyavei ndoyavĩi cornalina porañetesa no. Iyavei oime oyere tuprĩ vahe tenda rese inungar arco iris sendĩ vahe, inungar esmeralda.

⁴ Iyavei asepia evocoi rese oyere tuprĩ ambuae veinticuatro tenda, ahe iharive oguapĩ yuvĩnoi veinticuatro avei icuapĩ yuvirecoi vahe; iturucuar morochĩ vahe yuvireco iyavei oãca rese omboyere tuprĩ oro apoprĩ yuvireco.

⁵ Evocoiyase Tũpa renda sui yuvĩnose overavera vahe, iyavei siapu guasu vahe, osunu vahe no; iyavei siete tuprĩ tataendi sendipa yuvireco evocoi tenda rovai, ahe co siete tuprĩ Tũpa espĩritu.

⁶ Evocoi tenda rovai oime avei ndoyavĩi tuprĩ para guasu tĩpiu vahe oyecua tuprĩ vahe mbahe ipipe.

Ambuae tenda pãhu rupi oyere tuprĩ Tũpa renda rese irungatu ivã pendar yuvirecove vahe, ahe sesa oyere tuprĩ vahe sese, ahe osareco tuprĩ vahe gũenonera, guaquicuei cotĩ avei no.

⁷ Yipĩndar yuvirecove vahe pãhu pendar ahe ndoyavĩi tuprĩ yagua pĩta; saquicuerindar ndoyavĩi tuprĩ guaca cuimbahe; imombosapĩsa ndoyavĩi eté ava; imoirungatusa cute ndoyavĩi

vira guasu oveve vahe.

⁸ Evocoi ìva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pĩtu rupi aipo ehi yuvireco:

“¡Santo, santo, santo ité secoi, yande Yar Tũpa ité, ahe mbahe mboavaisarēhi, yipivé vahe ité, cũriteindar, apirēhi vahe!”

ehi yuvireco.

⁹ Evocoi yuvirecove vahe omboetei yuvireco, “Aviye ndeu” ehi co oguapĩ vahe oĩ tenda harive ndopai vahe upe.

¹⁰ Ēgüe ehise evocoyase veinticuatro tupri icuaipri yuvirecoi vahe, ahe oñenopiha imboeteisa pipe sovai yuvireco. Ipare osequiĩ oãca resendar oyere tupri vahe omborerecuasa resendar sovai aipo ehi:

¹¹ “Ore Yar Tũpa, iya ité nde mboeteisa, ndeu sapucaisa nde pĩratasa rese.

Esepia, nde ereyapo vahe mbahe opacatu; nde remimbotar rupi niha oime opacatu mbahe”

ehi yuvireco chupe.

5

Ovesami upe güeraño iyacatu cuachiar imboyapri mboi ãgua

¹ Che asepia cuachiar Tũpa vireco vahe oacato coti, icuachiapri ipipe coti, ocar coti avei no, imboyapri siete sello pipe.

² Ipare asepia Tũpa rembiguai seco ivate vahe, ahe oporandu pĩrata oico aipo ehi: “¿Ava upe vo

iyacuachiar mboi ãgua iyavei sello imboyeroyapri mondoro ãgua no?” ehi.

³ Ndipoi eté rumo que iva pendar, ivi pipendar, ivivri pendar oicatu vahe ã cuachiar pipira sepia ãgua viña.

⁴ Evocoyase che ayasehó iteanga. Esepia, ndipoi eté que ñepeí yepe oime angara aviye vahe cuachiar pipira sepia ãgua viña.

⁵ Ahese icuapri pãhu pendar ñepeí aipo ehi cheu: “Ereyaseho iri eme. Esepia niha, evocoi ava yagua pãta vahe vahe chupe, Judá suindar, acoi mborerecuar guasu David suindar avei, ahe niha Carugar osecoreroyi. Sese iya ité chupe siete sello mondoro cuachiar pipira ãgua” ehi.

⁶ Evocoyase, asepia Tũpa rovai iva pendar irungatu yuvirecove vahe pãhuve, icuapri yuvirecoi vahe mbiterve, ñepeí ava Ovesami nungar ihãí, aviye seropovẽhepri. Ahe niha vireco siete tupri sãchi, siete tupri avei sesa; sesa evocoyase siete tupri Tũpa espíritu yuvirecoi opacatu ivi rupi imboguatapri.

⁷ Ipare evocoi Ovesami oso, oipisi cuachiar evocoi tenda harive oguapí vahe yacato coti sui;

⁸ ipisi pare, evocoi irungatu yuvirecove vahe, iyavei veinticuatro tupri icuapri, ahe oñenopihapa Ovesami rovai yuvireco. Oyacatu ñepeí-peí vireco arpa yuvireco, itaisi riru oro apopri, ahe avei vireco yuvireco, ahe itaisi niha Tũpa reroyasar yeruresa.

⁹ Osapucaí ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi ãgua, imboyapri mondoro ãgua avei no.

Esepia niha, nde yucapri seropovēhepri ereico. Evocoiyase nde ruvi pipe eremboepipa Tūpa upe nara opacatu ava ambuae-ae tēi vahe, iñehe ambuae-ae tēi vahe avei, ñepei-pei tecua yacatu rupindar, ivi rupindar avei yuvireco.

¹⁰ Iyavei eremomborerecua uca Tūpa upe nara, erembopahi uca avei no, ipare ahe oporocuaira opacatu ivi rupi yuvireco” ehi osapucai yuvireco.

¹¹ Ipare asepia, asendu avei Tūpa rembiguai rehi ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuaipri ñehe avei asendu setá iteanga yuvirecoi.

¹² Ahe aipo ehi pĩrata yuvireco no: “iCo Ovesami yucapirer, ahe chupe iyacatu ité mborerecuasa pisi āgua, opacatu Tūpa suindar porerecosa pisi āgua, mbahecuasa, pĩratasa, mboyeroyasa, poromboeteisa, iyavei sapucaisa pisi āgua avei no!” ehi.

¹³ Ahese asendu avei opacatu Tūpa rembiapo ivave yuvirecoi vahe, ivi pipendar, ivivri rupindar iyavei para guasu pipendar, aipo ehi yuvireco: “iToime sapucaisa, Tūpa upendar mboyeroyasa, imboeteisa, iyavei pĩratasa, ahe timondosa apirēhi vaherā Tūpa acoi güendave oguapi vahe upe, Tahir Ovesami nungar upe avei no!” ehi.

¹⁴ Evocoi irungatu ava yuvirecove vahe, “iĒgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopiha yuvireco sovai imboeteisave.

6

Siete sello

¹ Ipare asepia acoi Ovesami omondoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pãhu pendar oñehe pĩrata. Iñehe ndoyavii osunu vahe, “¡Erio!” ehi cheu.

² Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ëgüe ehi ahe osẽ seco pĩrata catu vahe ava reco reroyi ãgua.

³ Omondorose acoi Ovesami imoñuviriosa sello, ahese asendu imoñuviriosa yuvirecove vahe pãhu pendar ñehe, “¡Erio!” ehi vahe cheu.

⁴ Ipare osẽ cavayu pĩra vahe, ahe ava ihari pendar oipisi pĩratasa mbahe tupriisa rerocua ãgua ivi pĩpendar ava sui ‘toyeyuca-yuca tẽi yuvireco’ oyapave. Ipare imondosa quise pucu chupe.

⁵ Omondorose acoi Ovesami imombosapisa sello, ahese asendu imombosapisa yuvirecove vahe pãhu pendar ñehe, “¡Erio!” ehi vahe cheu. Amahe sese, ipare asepia cavayu sũ vahe, ahe ava ihari pendar vireco opo pipe mbahe rãhasa.

⁶ Ipare asendu yuvirecove vahe cotindar ñehe, ahe aipo ehi: ‘Nẽpei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no” ehi.

⁷ Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Erio!” ehi cheu.

⁸ Amahe, ipare asepia cavayu iyu rasi vahe, ahe ava ihari pendar serer Tehõgüer. Ipare

saquicuei ou vahe oico ahe serer Omano-vahe-recosa. Ahe chupe yuvireco imondosa teco pĩratasa ivi imoirungatusa yahocuer rupi iguata ãgua ava yuca ãgua vavasa pipe, tieporẽhi pipe, mbaherasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepia mbahe seropovẽhepri rendavrive ava hã, ahe yucasa vahe yuvireco Tũpa Ñehengagũer mombehusa sui tẽi iyavei Jesũs reroyasa sui tẽi avei no.

¹⁰ Ahe aipo ehi pĩrata yuvireco: “Ore Yar Tũpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pipendar ore repisave?” ehi yuvireco.

¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepepe ovasa sello, ahese oime ivi riri ipĩratã vahe. Ari evocoyase sũ, aviye acoi turucuar sũ vahe mano sendar yemondesa iyavei yasi pĩrã inungar tuvi,

¹³ yasitata evocoyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi.

¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pãhu avei no osiri gũenda sui yuvireco.

¹⁵ Mborerecuareta avei co ivi pipendar yuvirecoi vahe opa tẽi oñemi mbahecuar pipe yuvireco, ita guasu pãhu rupi avei yuvireco no, oyoya guasu seco ivate vahe, sundao rerecuareta,

mhahe yar seco pĩratá vahe, iyavei opacatú tupri mbiguai eta, ava ndahei vahe mbiguai avei;

¹⁶ iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tẽi Tũpa sui iyavei Ovesami sui acoi ombou vahe co poronupasa ipĩrata vahe oreu!

¹⁷ Esepia, oyepota ité Tũpa ñemoirosa oreu. Ndipoi chietera ava oyemoviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Tũpa rembiguai iva pendar yuvinohai vahe irohi coti, norte coti, ari sãsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuẽhi água, que para guasu pipe angara viña, que ñepe yepe ivira ro angara viña no.

² Ipare asepia avei ambuae Tũpa rembiguai iva pendar ou vahe ari sãsa coti sui, ahe vireco oyese Tũpa oicove vahe rer mondose. Ahe niha osapucaí pĩratá evocoi irungatu tupri Tũpa rembiguai iva pendar yuvirecoi vahe upe, oipisi vahe pĩratasa ivi, para guasu momara água yuvireco, aipo ehi:

³ “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tũpa rembiguai eta upe isiva rese Tũpa rer icuachiapri!” ehi.

⁴ Ipare asendu Tũpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pãhu sui iporavopri yuvireco.

⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar,

⁶ doce mil tupri Aser suindar, doce mil tupri Neftalí suindar, doce mil tupri Manasés suindar,

⁷ doce mil tupri Simeón suindar, doce mil tupri Leví suindar, doce mil tupri Isacar suindar,

⁸ doce mil tupri Zabulón suindar, doce mil tupri José suindar, ipa evocoyase doce mil tupri Benjamín suindar.

Ava rehi iturucuar morochi vahe

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochí vahe pāve; pindo-pindomi vireco opove yuvireco no.

¹⁰ Ipare opacatú guasu oñehe pĩrata yuvireco aipo ehi:

“¡Poropĩsirosa yande Ru Tūpa suindar, ahe oguapi vahe oĩ güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuaipri rese avei yuvinoha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboetisave yuvireco,

¹² aipo ehi:

“¡Ĕgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyeroyasa, mborerecuasa,

teco pĩratasa avei tasecoi yande Ru Tũpa upe!
jĕgũe tehi apĩrẽhi vaheĩ ité yepi!” ehi.

¹³ Ahese icuaiprĩ ipãhu pendar aipo ehi cheu cute: “¿Ereicua vo co ava rehi iturucuar morochi vahe pãve yuvirecoi, ereicua que sui pĩha yugũeru?” ehi.

¹⁴ Che evocoiyase, “Nde rumo ereicua” ahe chupe. Ipare ahe aipo ehi cheu: “Co acoi yuvĩnose tuprĩ vahe ité teco asisa sui yuvireco, inungar oyosei, omomorochi vahe oturucuar, ĕgũe ehi avei gũecocuer imomorochi Ovesami ruvi pipe yuvireco.

¹⁵ “Sese Tũpa renda rovai yuvirecoi, chupe mbahe apo ãgua ari, pĩtu rupi avei sēta pipe.

Gũendave oguapĩ vahe oĩ, gũecocuer pipe osepĩra.

¹⁶ Evocoi ndiyumbiasĩ iri chira yuvireco, ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

¹⁷ Esepia, evocoi Ovesa secoi Vu renda rovai, ahe osãrora ava rehi sereco inungar ovesa rãrosar. Ipare opara viraso tecovesa resendar i ndopai vahesave imboihu ãgua.

Tũpa evocoiyase omombituhupara imboyasehosa sui yuvireco” ehi.

8

Imoñuvirío ovasa sello iyavei itaisi rapisa oro apoprĩ

¹ Ipare coiye cute co Ovesami omondorose imoñuvirío ovasa sello cuachiar mboyasa ichui,

ahese s̄iu tupri ivave ñepei hora yemombitesa rupive.

² Ichui asepia siete tupri Tūpa rembiguai iva pendar yuvinohai vahe Tūpa rovai, chupe opa imondosa siete tupri mimbi.

³ Ipare ou ambuae Tūpa rembiguai iva pendar oro itaisi rapisa reseve, iyavei ou ohã itaisi rapisa renda rovai; ipare imondosa tuvichá itaisi chupe oicuavêhe vaherã oyoya tupri opacatu ava Tūpa upendar yeruresa rese oro mbahe reropovêhepri renda harive; ahe Tūpa renda rovai chini vahe.

⁴ Itaisi râtachi evocoyase oso Tūpa rembiguai iva pendar po sui. Ēgüe ehi oyepota oso Tūpa recosave, oyoya tupri chupendar yeruresa rese.

⁵ Ipare evocoyase Tūpa rembiguai iva pendar opoco itaisi rapisa rese, omboapipo mbahe reropovêhepri renda pendar tâtapii pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi oririi.

Siete vahe mimbi

⁶ Evocoyase siete tupri Tūpa rembiguai iva pendar oyemoingatu voi güemimbi moñehe ãgua yuvireco.

⁷ Yipindar vahe Tūpa rembiguai omoñehe güemimbi, ahese imombosa ivi hari rupi amanda iyavei tata oyeseha vahe tuvise. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihi reseve avei opa yuvirocai.

⁸ Imoñuviriosa Tūpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe;

ipare para guasu mombosapisa yohacuer oyeapo tuvi.

⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocañisa.

¹⁰ Ipare imombosapisa Tũpa rembiguai iva pendar omoñehe güemimbi, ahese yasitata tuvichá vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi iai mombosapisa yahocuer pipe iyavei ivi sui i ohẽ vahe mombosapisa yahocuer pipe avei no.

¹¹ Yasitata rer evocoyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoirungatusa Tũpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pĩtu mombosapisa yahocuer pipe avei no.

¹³ Ipare asepia, asendu avei no vira guasu ovevese iva mbiter rupi, aipo ehi pucu oñehe oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tũpa rembiguai güemimbi yuvireco!” ehi.

9

¹ Tũpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu pĩtumimbi vahe mboisa.

² Ipare omboise ivicuar rovapisa, ichui opūha tātachi, inungar acoi horno guasu pipe sui osē vahe. Evocoyase evocoi tātachi ndosesape uca iri ari upe, niporēhi iri eté mbahe.

³ Iyavei evocoi tātachi sui opa yuvínose tucru guasu rehi oñemosai opacatu ivi rupi; chupe avei imondosa seco pĩrata ãgua inungar acoi mba-herumbiquiãpe.

⁴ Icuaisa rumo opacatu capihi mbahe rocri iyavei ivira momaraēhi ãgua, ěgüe ehi rumo acoi ava nomboyecuai vahe osiva rese Tũpa rer, chupe nara ité.

⁵ Nimondosai rumo mborocuita chupe ava yuca ãgua. ěgüe ehi rumo ‘tomombaraisu pucu rane poyandepo yasi rupi sereco’ oyapave tēi, inungar tupri acoi mba-herumbiquiãpe rasicuer.

⁶ Evocoi ari rupi ava oipota tēira omano ãgua yuvireco viña. Imanosa rumo que vitera yuvireco ichui.

⁷ Tucru guasu rehi inungar cavayu imoin-gatupri vavasave nara yepi; oãca rese evocoyase vireco ndoyavi yeguaca oro apopri, iyavei sova aviye tupri ité ava repiaca.

⁸ Iha ndoyavi cuña ha, sãi evocoyase ndoyavi tupri yagua pĩta rãi.

⁹ Setecuer evocoyase oyopia tupri guarepochi apopri, iyavei ipepo riapugüer aviye tupri ité acoi cãreto riapugüer cavayu vinoña vahe vavasave.

¹⁰ Vireco vuguai rese opopiar aviye mba-herumbiquiãpe popiar. Ahe niha vireco opĩratasa poyandepo yasi rupi ava momara ãgua tēi.

11 Evocoi tucru guasu rerecuar, ahe icuaipri ivicuar ipicucu vahe mboi ãgua. Ahe serer hebreo ñehe pipe Abadón; griego ñehe pipe evocoyase Apolión ehi.

12 Opa yipindar vahe mbahe-mbahe tēi; oime vite rumo co pare ñuvirío mbahe tasi vahe.

13 Imoñepei ovasa Tūpa rembiguai omoñehese güemimbi, ahese asendu ñehesa itaisi rapisa renda oro apopri Tūpa rovaindar irungatu sãchi vahe pãhu sui.

14 Ahe aipo ehi evocoi imoñepei ovasa Tūpa rembiguai upe: “Eyorapa evocoi irungatu Tūpa rembiguai ñapichimbrĩ iai guasu Eufrates ivirindar” ehi.

15 Evocoyase opa yorasa ava mombosapisa yahocuer yuca ãgua yuvireco. Esepia, evocoi imoingatupri co arĩ rupi tuprise nara yuvireco.

16 Ipare asendu sundao rehi cavayu harive yuvirecoi vahe, ahe setacuer doscientos millones tupri.

17-18 Ëgüe ehi asepia cavayu rehi che quer nungar pipe, ihari pendar evocoyase vireco opochiha rupi tupri oyoepisa guarepochi apopri yuvireco, ahe iparagüer pĩra vahe tata nungar, sovi vahe, iyu vahe avei no. Cavayu rehi ãca evocoyase aviye tupri yagua pĩta ãca, iyuru sui evocoyase yuvinose-nose tata, tãtachi iyavei azufre. Ipipe sui ava mombosapisa yahocuer opa tupri omano yuvireco.

19 Esepia niha, cavayu pĩratasa iyuru rese chini, suguai rese avei no; ahe suguai ndoyavii tupri ité mboi ãca, ipipe avei ava omomara.

20 Ava rumbirer rumo nomanopa vıteı vahe co mbahe tēi sui yuvıreco, nosecuñaroı eté güecocueraı yuvıreco. Ndopoi potai eté carugar mboeteı aısa sui, iyaveı opacatu mbahe rahanga tēi oro apoprı, guarepochi, bronce, ita, anıse ivıra apoprı mboeteısa sui aveı yuvıreco. Evocoi mbahe apoprı rumo ndosarecoı vahe, ndosendui vahe ité mbahe, ndoguataı vahe aveı.

21 İyaveı noñecuñaro potai eté oporapichısa sui yuvıreco, opaye aısa sui, que cuña, que cuimbahe ambuae rese angaipı aposa sui, omonda raisa sui aveı.

10

Tūpa rembiguai iva pendar vıreco vahe icuachi-aprı cuachiarmi

1 İpare asepiı ambuae Tūpa rembiguai iva pendar ipıratá vahe ogüeyıse iva sui ou mbahe pıtu pãhuve; ahe ñaca rese arco iris oyere tuprı. Sova sendı aviye arı, setıma evocoiyase ndoyavıı tata rendıgüer opūha tuprı vahe.

2 Cuachiarmi oyemboı vahe vıreco opove. Opi oacato cotındar pipe opıro para guasu rese, ambuae opıve evocoiyase opıro ivı rese.

3 Evocoiyase sãse pıratá, inungar yagua pıta rãse; sãse, evocoiyase siete tuprı osunu vahe ñehe oyendu yuvıreco.

4 Oñehepase, ahese iñehe che aıcuachiara viña; asendu rumo iva sui ñehesa aıpo ehi vahe: “Eremboyecuai rene acoı siete tuprı osunu vahe ñehe, ndereıcuachıai chıetera” ehi cheu.

⁵ Evocoyase Tũpa rembiguai asepia vahecuer, ahe acoi opĩro vahe para guasu rese, ivi rese avei opo oacato cotĩndar omopuha iva coti.

⁶ Ichui Tũpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera;

⁷ oyepotase rumo imoñuvirio ovasa Tũpa rembiguai upe güemimbi moñehe ãgua, ahese imboavıyesara Tũpa remimbotar yipĩndar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiarımi imboipri Tũpa rembiguai vıreco vahe evocoi opĩro vahe para guasu rese ohã, ivi rese avei no” ehi.

⁹ Evocoyase aso Tũpa rembiguai upe, aporandu cuachiarımi rese, ahese ahe aipo ehi cheu: “Ndo co, eipisi, ehu. Nde yuru pipe evocoyase sēhera eiri nungar, nde avıterve rumo irora” ehi cheu.

¹⁰ Ahese aipisi cuachiarımi cute Tũpa rembiguai sui, ipare ahu; yipĩndar sēhé che yuru pipe inungar eiri, amocopase rumo, che avıterve iró cheu.

¹¹ Evocoyase aipo ehi yuvıreco cheu: “Nde ereñehe irira Tũpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborerecuar rese avei no” ehi.

11

Ñuvirio ava Tũpa recocuer mombehusar

¹ Ipare ombou vara mbahe rãhasa yuvıreco cheu, ichui aipo ehi yuvıreco cheu no: “Erio,

teresãhapa tũparo, mbahe reropovẽhepri renda avei, ipare opara ereipapa ipipendar Tũpa mboeteisar retacuer” ehi.

² “Nderesãhai chira rumo ñachimbrì pipe tũparo rocar rupi. Esepia, evocoi opa imondosa ava Tũpa ndoicuai vahe upe, ahe opĩrora tecua nimarai vahe rese yuvireco cuarenta y dos yasi rupi” ehi.

³ “Ipare ñuvirío ava amondora che recocuer mombehu ãgua opacatu ava upe mil dosciento sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai.

⁵ Acoi que oimese ovireco mara pota vahe, ahese che reco mombehusar yuru sui osẽra tata sapipa ãgua; ãgũe ehira ava omano que che reco mombehusar reco momara potasar.

⁶ Co ñuvirío vireco opĩratasa oqui vahe mombita ãgua, acoi ari rupi che reco mombehu vitesese yuvireco; iyavei vireco pĩratasa i recuñaro ãgua tuvi pipe yuvireco, imombaraisu uca ãgua avei ivi opacatu-catu tẽi mbaherasi pipe güemimbotar rupi.

⁷ Omboaviyepase rumo Tũpa reco mombehusa yuvireco, ahese osẽra ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara.

⁸ Sehõgüer evocoyase yangarecuavẽhi tẽi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no.

9 Ipare mbosapĩ arĩ yemombitesa rupi, ava-ava tẽi tecua rupindar, ava ambuae-ae tẽi vahe, iñehe ambuae vahe iyavei ambuae-ae ivi rupindar os-epiaño tẽira sehõgüer yuvireco iyavei ahe noñoti ucai chietera ava upe yuvireco.

10 Ava yuvirecove vahe ivi pipe, ahe oviharetera yuvireco imano rese. Ëgüe ehira sorivete, ipor-erecora oyese yuvireco. Esepia, evocoi ñuvirío ava Tũpa ñehe mombehusar imombaraisupirer yuvirecoi.

11 Mbosapĩ arĩ yemombite pare rumo, Tũpa opa ombogüerayevi, ahese opũhapa yuvireco. Evocoyase ava opacatu osepia vahe osiquiyé iteanga yuvireco ichui.

12 Ipare ahe ñuvirío osendu yuvireco ñehesa ipĩrata vahe iva suindar aipo ehi vahe: “¡Peyeuropa ave ivate!” ehi. Evocoyase opa oyeupi ivave yuviraso iva quihã pãhu rupi oamotarẽhisareta rembiepiave.

13 Aheseve voi oime ivi rirĩi tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoyase ava rumbirer, osiquiyepave tẽi osapucã Tũpa iva pendar upe imboeteisa pipe yuvireco.

14 Opa mbahe-mbahe tẽi moñuviriosa cute; ou poyava irira rumo imombosapĩsa.

Imoñuvirío ovasa Tũpa rembiguai omoñehe güemimbi

15 Imoñuvirío ovasa Tũpa rembiguai omoñehese güemimbi, ahese oyeendu ñehesa ipĩrata vahe iva suindar aipo ehi vahe:

“Yande Yar Tūpa, Sembiporavo Poropĩsĩrosar avei vireco co ivi pĩpendar mborerecuasa opovrive yuvireco cūte.

Ahe evocoiyase mborerecuar apirēhi vaherã itera secoi” ehi.

¹⁶ Evocoiyase veinticuatro tupri icuaipri, evocoi oguapri vahe yuvinoi Tūpa renda rovai, ahe oyeaivi omboya ité osiva ivi rese imboeteisa pĩpe yuvireco, ¹⁷ aipo ehi:

“Aviye ndeu ore Yar, Tūpa mbahe mboavaisarēhi, nde acoi yipĩsuive vahe ité, ereicoveño avei cūritei.

Esepia, nde pĩratasa tuvichá vahe pĩpe ereporocuai eico.

¹⁸ Ambuae tecua rehii pendar nde amotarēhi ité yuvireco.

Nde ñemoirosa rumo cūritei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe,

ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pĩpe mbahe tēi rerusar” ehi yuvireco.

¹⁹ Ahese oyemboi tūparo iva pendar, iyavei oyecua tupri cuachiar porocuaíta resendar rĩru. Ipare overa-vera, siapu guasu, osunu, ivi orĩrii, amanda osururú avei no.

12

Cuña iyavei mbahe ipi oporomocañi vahe

¹ Evocoyase iva rese oyecua mbahe poromondiisa tuvichá vahe ambuae mbahe mboyecua ãgua: oime cuña iturucuar inungar ari rendigüer, aviye opïro vahe yasi rese ohã, oãca yeguaca rese doce tupri yasitata vireco.

² Co cuña ipuruha oico, sãsé tẽi omembrï iha pota ãgua oyesui. Esepia niha, oiporará ité tasicuer.

³ Ipare coiye oyecua iva rese ambuae mbahe mboyecua tuprisa: mbahe ipi pïra vahe, ahe ñaca siete tupri, sãchi evocoyase diez iyavei vireco yeguaca oãca yacatu.

⁴ Suguai evocoyase ombotiriri yasitata iva pendar imombosapisa sui ñepei yahocuer seraso. Ipare opa omombo ivive. Ahe evocoyase opita osãro cuña imembira pota vahe rovai ohã, “Tahupaño voi imembrï oha ramoseve” ehi viña.

⁵ Ipare co cuña membrï oha cuimbahemi, ahe mborerecuar virecora mbococa guarepochi apopri, ipïrata catu vahe secoira opacatu ava ivi rupindar upe. Ichui serocuasa voi serasosa Tũpa rovai.

⁶ Cuña evocoyase oñemi ivi iporupirẽhisave oso. Aheve omoingatu Tũpa iyemboerecua ãgua, eipeve icaru ãgua mil doscientos sesenta ari rupi.

⁷ Oime avei vavasa ivave; ahese Tũpa rembiguai iva pendar ivate catu vahe Miguel güeru ovoya eta ovava ãgua mbahe ipi oporomocãni vahe upe ivoya upe avei yuvireco.

⁸ Ndoicatui eté rumo Miguel recopi ãgua yuvireco. Sese ndipoi eté ivave seco ãgua yuvireco chupe.

⁹ Ëgüe ehi imboyepipisa mbahe ipi oporomo-

cañi vahe reco pĩratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopambopa tẽi vahe opacatu ivi pipe yuvireco.

¹⁰ Evocoiyase asendu ñehesa ipĩrata vahe ivave, aipo ehi vahe:

“Cũritei oime poropĩsirosa, pĩratasa iyavei yande Tũpa mborerecuasa, Poropĩsirosar mborerecuasa avei no.

Esepia niha, imboyepipisa iva sui acoi oseca-seca vahe yande rivri Tũpa reroyasareta recocuer momara ãgua pĩtu, ari yacatu rupi yande Ru Tũpa rovai.

¹¹ Yande rivri osecoreroi Ovesami ruvi piyere pipe sui yuvireco iyavei acoi secocuer mombehu tupriisa pipe sui avei no.

Esepia niha, ndosiquiyei eté güetecuer mocañi ãgua yuvireco.

Ahe rumo oyemoingatu voi eté omano ãgua.

¹² ¡Peyemboviha catu pe iva iguar peico vahe!

Pe rumo, ¡preparaisu catura ivi pipe, para guasu pipe avei peico vahe!

Esepia niha, Carugar ogüeyi pẽu oñemoirosa pipe, oicuase güeco pucuẽhi ãgua” ehi.

¹³ Ipare mbahe ipi oporomocañi vahe oicuase imombopri güecose ivi rese, ahese omoña cuña imembrĩ cuimbahemi reseve yamotarẽhisa pipe.

¹⁴ Evocoi cuña upe rumo imondosaño ñuvirio vira guasu pepo iveve ãgua chupendar ivi imoin-gatupri ava porẽhisave seco ãgua, amombri mbahe ipi oporomocañi vahe sui. Aheve oyopoi mbosapi araviter yemombitesa rupive.

15 Ipare mbahe ipi oporomocañi vahe oyuru rupi ombotipimacua cuña raquicuei iai apo 'tocañi tēi' oyapave viña.

16 Ivi rumo oime co cuña p̃tiviisa, ahe oyeca. Ipare opa omoco iai evocoi mbahe ipi oporomocañi vahe rembiapo.

17 Evocoiyase, oñemoiró iteanga cuña rese, ipare oso ovava ambuae ichuindar rehi rese, ahe omboyeroya vahe ité Tūpa porocuita yuvi reco iyavei yuvi recoi tupri vahe Jesucristo remimombehu rupi.

18 Ipare mbahe ipi oporomocañi vahe opita para guasu popive ohã.

13

Ñuvirío mbahe ipi vai

1 Ipare asepia para guasu pipe sui osēse mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoiyase vi reco ñepeipei oyeguaca, iyavei oãca yacatu rese vi reco terer Tūpa upe mbahe tēi vahe.

2 Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoiyase aviye yagua p̃ta yuru. Mbahe ipi oporomocañi vahe evocoiyase omondo opiratasa iyavei omborerecuasa chupe.

3 Ñepe mbahe ipi vai ãca oyeapicha guasu vahe ndoyavii omano vaherã ité viña; ahe rumo ocuera tupri iriño evocoiyase opacatu guasu ava sepiase, ndoyembovihal. Ichui viroya catu yuvi reco.

4 Omboetei guasu mbahe ipi oporomocañi vahe sereco yuvi reco. Esepia, omondo omborerecuasa

mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaherã sese” ehi yuvireco.

⁵ Iyavei mbahe ipi vai upe ipotasa iyemboivate ai ãgua oñehe pipe ava rovaque iyavei Tũpa reroĩro ãgua avei no, iyavei mborerecuar guasu seco ãgua cuarenta y dos yasi rupi.

⁶ Ëgüe ehi iñehe mara-mara tẽi Tũpa rese, iñehe-ñehe tẽi avei serer maranehi rese, sêta rese, ìva pendar rese avei no.

⁷ Imondosa avei chupe vavasa apo uca ãgua Tũpa upendar ava eta upe secopi ãgua. Ipare imondosa avei mborerecuar seco ãgua chupe ava ambuae-ae tẽi vahe upe, secua ambuae vahe upe, ambuae-ae tẽi iñehe vahe upe, iyavei ambuae ìvi rupindar upe avei no.

⁸ Ipare omboetei ai sereco yuvireco opacatu ava ìvi pipendar acoi ìvi apoẽhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyeoquenda uca vaherã, oyeoquenda ucaño itera; iyavei acoi ava omano vaherã quise pucu pipe, ipipeño ité omanora.”

Co pipe oyecua Tũpa rese yeroyasa iyavei ipiratasa ava chupendar rese.

¹¹ Ipare asepia ambuae mbahe ipi vai osẽ vahe ìvivri sui. Co vireco ñuvirío guãchi ndoyavii tupri Ovesa rãchi, mbahe ipi oporomocañi vahe ñehe pipe rumo oñehe oico.

¹² Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rãgüer sui.

¹³ Iyavei oyapo setá mbahe poromondiisa mbahe mboyecua ãgua. Iva sui eté niha oiti uca tata ivive imbou opacatu ava rembiepiave.

¹⁴ Ombopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo ãgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo ãgua imboeteisave.

¹⁵ Ipare imondosa pīratasa chupe tecovesa mondo ãgua evocoi sahanga upe ‘toñehe, toyuca uca avei ava opacatu omboeteiēhisar’ oyapave.

¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava ni-mañecoprii vahe upe, mbiguai tēi upe, ahe chupe, “Toyecuachía opo oacato cotindarve yuvireco, anise osivave” ehi.

¹⁷ Ahese ava ndipoi eté oicatu vahe mbahe rerocua, anise que mbahe mondo ãgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecuasa co renducua tupri ãgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

¹ Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco.

² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, Ëgüe ehi siapugüer.

³ Ipare osapucaí sapucaisa ipiasu vahe yuvireco Tūpa rovai iyavei iva pendar irungatu yuvirecove vahe rovai, icuaipri eta rovai avei no. Ñepi yepe que iva pendar ndoicatui eté evocoi sapucaisa rese oyembohe vaheã. Ëgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pāhu sui, ahe güeraño tupri ité oicatu osapucaí yuvireco.

⁴ Co ava ndoyapoi vahe ité mbahe co coti tēi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguata ruپی. Opa serocuasa ava pāhu sui iyavei inungar yipindar mbahe seropovēhepri Tūpa upe, Ovesami upe avei.

⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapi Tūpa rembiguai omombehu iñhe ava upe yuvireco

⁶ Evocoiyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñehengagüer pīsiosa resendar ndopai vahe imombehu āgua opacatu ava co ivi pipendar upe: opacatu ivi rupindar upe, ava ambuae-ae vahe

upe, iñehe ambuae-ae vahe upe, opacatu tecua rupindar upe avei no.

⁷ Ipare oñehe pĩrata aipo ehi: “Pesiquire Tũpa sui iyavei pesapucaĩ seco ivatesa rese chupe no. Esepia niha, cũritei oyepota ari chupe ava recocuer rese iporandu ãgua. Pemboetei catu oyapo vahecuer iva, ivi, para guasu, i ohẽ vahe avei no” ehi.

⁸ Ambuae Tũpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tẽisa resendar pipe!” ehi.

⁹ Ipare ambuae Tũpa rembiguai iva pendar imombosapisa, saquicue moña aipo ehi pĩratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía ãgua osiva rese, que opo rese no,

¹⁰ oipisi itera Tũpa ñemoirosa ipĩrata vahe ité; ipare omombarisura setecuer azufre ocai vahe pipe güembiguai iva pendareta reco maranehi rovaque, Ovesami rovaque avei no.

¹¹ Tãtachi icaigüer pendar evocoyase oyeupira ndopai vaheã, ahese ndipoi chietera pituhusa pitu, ari pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

¹² ¡Egüe ehira Tũpa rese ité yuvirecoi vahe yeroyasa oyecua ahe acoi iporocuita mboaviye tuprisar, Jesús reroya tuprisar avei yuvireco!

¹³ Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura

acoi ava omano vahe yande Yar rese yuvireco” ehi.

“Ēgüe ehi eté —ehi Espíritu imombehu—, opituhura oporaviquisa sui yuvireco. Esepia, mbahe sembiapo rerãcua osora ivave supi” ehi.

Ivi pipendar recoãhasa

14 Ahese asepia ìva quiha morochí vahe; iharive ndoyaviì ava uguapi vahe oĩ. Vireco niha oyeguaca oro apopri oãca rese iyavei mbahe miti asiasa saimbé vahe vireco opove.

15 Ipare osẽ ambuae Tũpa rembiguai tũparo sui. Ahe osapucái pĩrata evocoi ìva quiha harive chini vahe upe: “¡Eyasia nde remiti iyavei emonuha nde rembiasia! ¡Esepia, nde remiti ìvi pendar yaviye ité!” ehi ava recocuer uve chupe.

16 Evocoiyase evocoi chini vahe oyasia güemiti ivive oico, ahese opa omonuha güembiasia.

17 Ipare osẽ ambuae Tũpa rembiguai tũparo sui, ahe avei vireco mbahe miti asiasa saimbé vahe.

18 Ipare ambuae Tũpa rembiguai osẽ mbahe reropovẽhepri renda sui, ahe tata rese hañecosar secoi. Iyavei oñehe pĩrata evocoi vireco vahe mbahe miti asiasa upe aipo ehi: “¡Eyasia uva ha apacuar, evocoi oime vahe ìvi pipe! ¡Esepia niha, opa yaviye!” ehi.

19 Evocoiyase co Tũpa rembiguai inungar oyasia vahe uva ha ěgüe ehi opa ava ipeha ìvi pipendar. Ipare opa oyapocatu Tũpa ñemoirosa rãro ãgua.

20 Ipare inungar uva ha icambepri tecua cupeve, ěgüe ehi co ava imobaraisu; ichui osẽ tuvì evocoi tipigüer oyepota ité cavayu yuru penda rupi eté

sese, ahe ipucucuer trescientos kilómetros tupri ité.

15

Ipa siete tupri Tũpa rembiguai güeru mbaherasi yuvireco

¹ Ipare asepia ivave ambuae mbahe mboye-cuasa tuvichá vahe poromondiisa: siete Tũpa rembiguai, siete tupri mbaherasi ipa vahe vireco vahe, ahe ipá vahe ité Tũpa ñemoirosa.

² Iyavei asepia para guasu ndoyavii yepiasa oyeseha vahe tata rese. Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer cuachía ãgua yuvireco oyese. Ahe vireco Tũpa upendar arpa yuvireco.

³ Ipare osapucai Tũpa rembiguai Moisés sapucaisa yuvireco, iyavei Ovesami sapucaisa aipo ehi: “Tuvichá opacatu mbahe nde rembiapo, che Yar Tũpa opacatu mbahe mboavaisarẽhi; nde recocuer supi tupri vahe ité; seco ñvi vahe. ¡Too, nde mborerecuar guasu opacatu ivi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei ãgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

⁵ Ipare asepia ivave oyemboise Tũpa rêta imaranehi vahe. Aheve acoi yapocatusa mborocuita resendar.

⁶ Evocoyase ichui yuvinoſepa evocoi ſiete Tūpa rembiguai vireco vahe ſiete tupri mbaherasi vai yuvireco. Ahe iturucuar ſecoſe vahe, ndiquihai vahe, ſendí iteanga. Vumbicuasa ipe vahe oro apopri pipe evocoyase oyeumbicua opochiha rupi tupri yuvireco.

⁷ Ipare ñepei evocoi irungatu iva pendar yuvirecove vahe pāhu pendar omondo ſiete tupri Tūpa rembiguai upe ſiete Tūpa ñemoiroſa riru oro apopri, ahe oicove vahe ité, ndopai vahe.

⁸ Ipare Tūpa rēta omboapipo tātachi, evocoi ou vahe Tūpa reco porañetesa iyavei ipĩratasa ſui. Aheve ndiyai eté que ava upe ſeique āgua acoi opase voi eté omomba ſiete tupri mbaherasi vai vireco vahecuer ſiete Tūpa rembiguai.

16

Siete Tūpa ñemoiroſa riru

¹ Evocoyase asendu ñehesa ipĩrata vahe oſé vahe Tūpa rēta pipe ſui. Ahe aipo ehi ſiete Tūpa rembiguai yuvirecoi vahe upe: “Peso, tapeipiyerepa ivi hari rupi evocoi ſiete tupri mbahe riru pipendar Tūpa ñemoiroſa” ehi.

² Yipindar vahe Tūpa rembiguai opa oipiyere igua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime ſetá caracha vai tasi vahe.

³ Tūpa rembiguai imoñuvirioſa opa oipiyere igua riru pipendar para guasu pipe. Ahe evocoyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

4 Tūpa rembiguai imombosapisa opa oipiyere igua rīru pīpendar iai pīpe, i ohē vahe pīpe avei no. Ipare opa ahe oyeapo tuvī yuvireco.

5 Co pare asendu Tūpa rembiguai i rese ihañeco vahe ñehesa aipo ehi:

“Nde seco tupri vahe ité ereico evocoi ava upe erembose nde ñemoirosa, che Yar Tūpa, seco maranehi vahe.

Nde yipisuiendar ité ereico.

6 Esepia, ahe opa oyuca ndeundar ava iyavei nde ñehe mombehusar yuvireco.

Cūrītei rumo eremboihu uca tuvī pīpe.

¡Evocoi nungar upe aviyesa rupi eté!” ehi.

7 Asendu avei ambuae ñehesa mbahe reropovēhesa renda sui aipo ehi vahe: “Supi eté, che Yar Tūpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco iivi vahe ité no” ehi.

8 Tūpa rembiguai imoirungatusa, opa oipiyere mbahe rīru pīpendar ari rese, ipare ari upe imondosa pīratasa ava rapipa āgua.

9 Ipare opacatu ité ava yuvirocaipa tupri; ndoyevii eté rumo Tūpa upe iyavei nomboeteiño ité yuvireco. Ēgüe ehi rumo iñehe mara-mara tēiño mbaherasi rerecose Tūpa upe yuvireco.

10 Tūpa rembiguai imbopoyandeposa oipiyere mbahe rīru pīpendar mbahe ipi vai renda rese. Ahese aviyeteramo tēi sereciar ipovri pendar avei pītumimbisave yuvirecoi. Ava evocoiyase oñeapecusuhu-suhu tēi yuvireco mbahe rasicuer pāhuve;

11 ndopoiño ité rumo mbahe-mbahe tēi aposa sui yuvireco, ahe rumo iñehe mara-mara tēiño

Tũpa ivate vahe rese oyeupe mbahe tasi vahe pãhuve yuvireco.

¹² Tũpa rembiguai imoñepei ovasa oipiyere mbahe riru pipendar ïai guasu Eufrates pipe. Ahe evocoyase opa ipiru peri apo ãgua añihivei coti sui mborerecuareta yu ãgua.

¹³ Ipare asepia mbahe ipi oporomocañi vahe, mbahe ipi vai, ndahei vahe Tũpa ñehe mombehusar supi vahe avei, ahe yuvirecoi vahe yuru rupi yuvinose mbosapi caruguar vireque nungar.

¹⁴ Co Caruguar suindar yuvirecoi, ahe oyapo poromondiisa mbahe mboyecuasa yuvireco. Ipare opa yuvinose opacatu ivi rupi mborerecuareta monuha ãgua vavasave nara, acoi ari cañi pipe Tũpa mbahe mboavaisarēhi amotarēhisave.

¹⁵ “Peyapisaca tupri che ñehe rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviye vahe pipe. Ahese nochi chietera oico che sui” ehi.

¹⁶ Ipare opa omonuha mborerecuareta hebreo ñehe pipe serer Armagedón ve.

¹⁷ Evocoyase imbosietesa Tũpa rembiguai oipiyere iñemoirosa mbahe riru sui ivitu rupi. Ipare ïva pendar Tũpa rēta pipe sui osē ñehesa ipirata vahe evocoi ou vahe senda sui: “ïOpa ité yaposa cute!” ehi.

¹⁸ Ahese oime overa vahe, mbahe siapu guasu vahe iyavei osunu vahe. Ipare ivi oririi ipirata catu vahe opacatu ivi ririi sui ava yuvirecove viteseve ivi pipe.

19 Tecua guasu oyeca-yeca mbosapî rupi, opacatu tecua evocoyase opa onduru ivi pipendar. Ipare Tûpa oyemomahenduha evocoi tecua guasu Babilonia pendar rembiapo ai rese, evocoyase omondo oñemoïrosa ipĩrata catu vahe chupe.

20 Opacatu caha pãhu, ivitri avei ocañipa ité yuvireco.

21 Iyavei yuviroviapipa iva sui ava harive amanda guasu, ahe iposiigüer cuarenta kilos rutei. Ava rumo iñehe mara-mara tẽiño vite ité Tûpa upe yuvireco amanda sui tẽi. Esepia niha, evocoi Tûpa poronupasa ivaté catu vahe.

17

Cuña oyemondo-mondo tẽi vahe mocañisa

1 Siete Tûpa rembiguai vireco vahecuer mbahe riru yuvireco, ipãhu pendar ñepei ou aipo ehi cheu: “Erio, amoyecuara co cuña yaguasa serai vahe upe ñemoïrosa ndeu, ahe evocoi oguapî i harive oĩ” ehi.

2 “Co cuña rese yaguasa-guasa tẽi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

3 Ipare che quer nungar pipe Espiritu omboycua vahe cheu, Tûpa rembiguai iva pendar che reraso ava porẽhisave. Aheve asepia cuña mbahe ipi vai pĩra vahe harive chini. Evocoi mbahe ipi vai opacatu rupi oyapete tupri ñehesa vai Tûpa amotarẽhisa sereco oyese, iyavei vireco siete tupri oãca, diez tupri guãchi.

⁴ Co cuña turucuar, suendi vahe, pĩra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasa-guasa tẽisa;

⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tẽi vahe si, opacatu ava ivi pipendar secocuer yavaeté vahe si avei no” ehi.

⁶ Ipare aicua evocoi cuña osavaipo vahe oĩ Tũpa reroyasar ruvi pipe iyavei acoi Jesús recocuer mombehusa sui tẽi yucapri vahe ruvi pipe avei no.

Co asepiase che quer nungar pipe, ndache mbovihai eté.

⁷ Ahese ahe Tũpa rembiguai iva pendar aipo ehi cheu: “¿Mahera vo nderevihai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oãca, diez tupri avei acoi sãchi” ehi.

⁸ “Acoi mbahe ipi vai eresepia vahe ahe yipive secoi vahe, cũritei rumo ndipo iri; osẽra rumo ivicuar guasu ipicucu vahe sui omano ãgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoẽhiseve, ahe ndovihai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara uma vireco mbahecuasa senducua ãgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña oguapi oĩ iyavei ahe siete ñaca avei omoporẽhi ‘siete tupri mborerecuar’ oyapave.

10 Cinco tupri mborerecuar evocoi ipãhu pendar ndipo iri yuvireco, ñepeño evocoyase oporocuai cūrítei oico, ambuae rumo ndou vîtei. Ouse rumo ipandar, ou raimi tēira.

11 Mbahe ipi vai secoi vahe yipindar, ndoicove iri cūrítei, ahe imbohochosa secoira mborerecuarã, yepe siete tupri vahe mborerecuar guasu mboetasa viña, ahe rumo ocañi tēi vaherã secouer” ehi.

12 “Evocoi diez tupri vahe sãchi, ahe mborerecuar diez tupri ndoyuviroique vîtei vahe oporocuai vaherã yuvireco. Oyoya rumo oporocuai raimi tēira mbahe ipi vai reseve yuvireco curi.

13 Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vaherã pĩratasa iporocuai ãgua yuvireco.

14 Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuaño vahe ité supi oguata ãgua yuvireco” ehi.

15 Iyavei Tũpa rembiguai aipo ehi cheu: “Evocoi para guasu erese pia vahe, iharive cuña yaguasaguasa tēi vahe uguapi oĩ, ahe ‘ava rehi tecua yacatu rupindar, iñehe ambuae-ae vahe iyavei opacatu ambuae tēi vahe ivi rupindar’ oyapave.

16 Evocoi erese pia diez tupri vahe sãchi mbahe ipi vai rese, ahe ndoyambotai chira cuña yaguasaguasa tēi vahe; iyavei osequi tupri seya; ohu-

para soho, ipare opara osapi.

¹⁷ Tūpa niha omondo ipiha pīpe mbahe güemimbotar apo āgua ‘ahe toyemonguerēhi yuvireco omborerecuasa mondo āgua mbahe ipi vai upe; tomboaviye rane ité che remimombehugüer yuvireco’ oyapave.

¹⁸ Iyavei evocoi cuña yaguasa-guasa tēi vahe eresepia vahe, evocoi niha tecua guasu ivi pīpendar mborerecuareta vireco vahe opovrive yepi” ehi Tūpa rembiguai cheu.

18

Babilonia viapi agüer

¹ Ipare asepia ambuae Tūpa rembiguai ipĩrata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi.

² Iyavei oñehe pĩrata oico aipo ehi:

“¡Oviapi tecua Babilonia cute!

Caruguar yuviroique sese, opacatu caruguar naporai vahe iyavei vırai vai nungar yuviroique sese.

³ Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoyase mborerecuareta ivi pīpendar oyapo mbahe tēi yuvireco sese, iyavei mbahe mboepısar ivi pīpendar oyemombahe eta imbahe porañete ai vahe pota raisa pīpe sui yuvireco” ehi.

⁴ Evocoyase asendu ambuae ñehesa iva sui ou vahe, ahe aipo ehi:

“Peyepēpi evocoi tecua guasu sui, pe peico vahe cheundar evocoi yangaipā rese imboyoyāēhi āgua.

Iyavei ñepēi yepē taperupitī eme imbaherasisa.

⁵ Esepia niha, yangaipagüer oyepota ité ivave.

Tūpa evocoiyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ēgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opīha pīpe oico:

‘Cohave che aguapī vīte mborerecuar che reconungar pīpe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tēi oura mbaherasisa chupe:

paraisusa, tieporēhi, manosa; ipare sapisara.

Esepia niha, yande Yar Tūpa mbahe mboavaisarēhi secoi, ahe, ‘Tomano’ ehi chupe” ehi.

⁹ Evocoiyase mborerecuar ivi pīpendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovihai chira sese osepiase evocoi cuña rātachi yuvireco curi.

¹⁰ Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pĩrata vahe tie viña!

Esepia niha, co aviyeteramo tẽi ou nde mombaraisu catusa” ehira yuvireco.

¹¹ Evocoyase ava mbahe mboepisar ivi pĩpendar yuvirecoi vahe, ahe avei oyaseho tẽira iyavei ndoyembovĩhai chietera evocoi tecua rese yuvireco. Esepia niha, ndipo iri chietera que virocua vahe rã imbahe yuvireco ichui,

¹² co opacatu mbahe sepi vahe rã ahe: oro, guarepochi, ita iporañete ai vahe, mbohĩr sendi vahe, turucuar secose vahe, turucuar sendi vahe, iyavei pĩraumbi vahe, pĩra vahe no; iyavei opacatu-catu tẽi ivirape sãacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei;

¹³ mbahe serocuapri yahu vahe canela, tembihu moiacuasa; itaisi, mirra, mbahe sãacua vahe; uva ricuer, mbahe quira, trigo cuhi aviyeye vahe, trigo avei; iyavei mbahe mĩmba ovosii vahe no, ovesa, cavayu, cãretomi iyavei mbiguai no.

¹⁴ Aipo ehi tẽira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tẽi apirẽhi opacatu nde mbahe eta nde yemboeteisa avei!” ehira.

¹⁵ Evocoyase evocoi mbahe mboepisareta oye-mombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tẽira iyavei ndoyembovĩhai tẽi chira yuvireco no,

¹⁶ iyavei aipo ehi tẽira yuvireco:

“¡Too! ¡Iparaisu iteanga tecua guasu pendar!

Inungar tie cuña acoi oyemonde tupri vahecuer
 secoi cuese viña iyavei iturucuar suendi,
 pĩra vahe; oro pipe oyemboetei vahecuer,
 itami iporañete vahe pipe iyavei mbohír sendi
 vahe pipe oyemboetei vahe no.

¹⁷ ¡Aviyeteramo tēi rumo opa ocañi imbahe eta
 ichui!” ehi.

Evocoiyase opacatu ava carite guasu pipendar
 rerecuar, ava imbehí ivirindar carite guasu
 reroguatasar, i rupi oporaviqui vahe oyeupe nara
 mbahe rereco ãgua, ahe opaño opita amombrive
 yuvireco ichui

¹⁸ iyavei co tecua rãtachi repiase, ahese osapucaí
 pĩrata tēi yuvireco: “¡Ndipoi eté niha yipisui tecua
 na ehi vahe!” ehi yuvireco.

¹⁹ Ipare imboasipave omondo ivi cuhi oãcave
 yuvireco, oyaseho iyavei ndoyembovihal tēi, ipare
 osapucaí tēi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe
 sui ava i rupi oporaviqui vahe oyemom-
 bahe yar yuvireco viña.

¡Aviyeteramo tēi rumo opa ocañi!” ehi.

²⁰ Peyembovihanõ evocoi tecua rese, pe iva pen-
 dar, iyavei opacatu chupendar peico vahe,
 pe no Jesús apóstol peico vahe,
 opacatu Tũpa ñehe mombehusar peico vahe avei
 no.

Esepia niha, co tecua omocañisa pipe Tũpa oyapo
 mbahe tupri pẽu nara.

²¹ Ahese Tũpa rembiguai iva pendar seco pĩrata
 vahe osupi ita inungar mbahe mbocuhisa, ipare
 omombo para guasu pipe aipo ehi:

“Na ehi aveira tecua guasu Babilonia mocañisa.
Imombopri secoira.

Ipare ndapesepia iri chietera apirēhi vaherã” ehi.

²² “Ndasendusa iri chietera ocar rupi arpa moñehesar, mimbĩ moñehesar, iyavei mimbĩ guasu moñehesar avei no; ndererecoi chietera ava oporaviqui vaherã, ndasendusa iri chiaveira ita mbahe mbocuhisa monarasa nde suindar.

²³ Iyavei ñepe yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pĩrata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pipe” ehi

Tūpa rembiguai chupe.

²⁴ Esepia niha, evocoi tecua guasu pipe oyecua Tūpa ñehe mombehusar ruvi, Tūpa upendar ava ruvi, iyavei opacatu ava yucapri vahe ivi pipendar ruvi avei.

19

¹ Co pare, asendu ava rehi ñehe pĩrata ivave aipo ehi vahe:

“¡Imboetepri yande Yar tasecoi!

Poropĩsirosa, teco porañetesa iyavei ipĩratasa ahe yande Ru Tūpa suindar.

² Esepia niha, ahe oyapo mbahe supi eté vahe, ‘Tocañi’ ehise co cuña oyemboaguasa-guasa tēi vahe nungar tecua guasu upe evocoi niha oseco momara tēi vahe ava ivi pipendar güeco rai pipe; ichui Tūpa osepĩ oyeupendar” ehi.

³ Ipare aipo ehi iri yuvireco no:
 “¡Imboeteipri yande Yar tasecoi!
 Esepia niha, evocoi tecua rãtachi ndopai chietera”
 ehi.

⁴ Evocoiyase veinticuatro tupri ìva pendar
 icuaiipri yuvirecoi vahe iyavei irungatu ìva pendar
 yuvirecove vahe, ahe Tũpa mboeteisa pipe oyeaivi
 ìvi rese yuvireco. Ipare aipo ehi yuvireco no:
 “¡Ëgũe tehi! ¡Imboeteipri yande Yar tasecoi!” ehi.

⁵ Evocoiyase Tũpa renda sui tupri oyeendu
 ñehesa aipo ehi vahe:
 “¡Pemboetei yande Ru Tũpa opacatu peroya vahe,
 que seco ìvi coti catumi vahe, que seco ìvate
 vahe avei, pe pesiquiye vahe imboyeroya
 ãgua!” ehi.

Pieta mendasa Ovesami resendar

⁶ Asendu avei ava rehi ñehe, inungar acoi itu
 guasu riapu, ndoyavi avei osunũ guasu vahe aipo
 ehi:

“¡Imboeteipri yande Yar tasecoi!
 Esepia niha, yande Yar Tũpa opacatũ mbahe
 mboavaisarẽhi omboipi oporocuai.

⁷ Tayayemboviha catu yaico iyavei tayamondo
 yande viharetesa, yande sapucaisa yande
 Ru Tũpa upe.

Esepia niha, cũritei oyepota mendasa ari Ovesami
 upendar.

Sembireco evocoiyase opa oyemoingatu oico:

⁸ chupe ipotasa iyemonde ãgua turucuar secose
 vahe, ndiquihai, sendi vahe pipe.

Esepia niha, co turucuar secose vahe ‘Tũpa rese
 yuvirecoi vahe recocuer ihĩvi vahe’ oya-
 pave aipo ehi” ehi.

⁹ Evocoyase Tũpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tũpa ñehesa supi tupri vahe ité” ehi.

¹⁰ Ipare añenopiha Tũpa rembiguai rovai imboetei ãgua. Ahe rumo aipo ehiño cheu: “Ëgüe erei rene. Esepia, che Tũpa rembiguai tēi aico nde nungar iyavei nde rivireta nungar oguata vahe Jesús ñehengagüer rupi. Emboetei Tũpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tũpa ñehe mombehusar upe.

Cavayu morochi vahe reroguatasar

¹¹ Evocoyase asepia ìva oyemboi vahe. Aheve aviyeteramo tēi cavayu morochi vahe oyemboyecua, evocoyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ñvisa pìpe oporocuai iyavei oyapo vavasa.

¹² Sesa evocoyase ndayaviyei eté acoi tata rendigüer; iyavei oãca rese setá vireco oyeguaca, iyavei vireco terer icuachiapri oyese; ahe güeraño ité oicua.

¹³ Iturucuar evocoyase imopirapri tuvì pìpe; serer evocoyase, “Tũpa Ñehe” ehi.

¹⁴ Sundao rehì ìva pendar saquicuerive yuvirecoi. Iturucuar secose vahe pãve morochí vahe, ndiquihai vahe avei. Ahe cavayu morochi vahe harive yuvirecoi.

¹⁵ Iyuru pìpe sui osē quise pucu saimbe vahe opacatu ambuae-ae tecua rupindar momara ãgua. Ahe oyocuirairã oamotarēhisar guarepochi apopri

opo pendar pipe. Iyavei osecoãhara inungar uva opive otiamii vahe yuvireco iyavei omboihura evocoi uva ricuer paraisu catusa resendar pipe. Ahese Tũpa mbahemboavaisarẽhi oñemoiro itera chupe.

¹⁶ Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

¹⁷ Ipare asepia Tũpa rembiguai opũha vahe arisave. Ahe osapucái pĩrata opacatu vĩrai mbahe rohoguar upe oveve vahe iva rese: “¡Perio! ¡Peñemonuha Tũpa suindar carusa guasusave;

¹⁸ pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ivi coti catumi vahe roho, seco ivate vahe roho avei!” ehi.

¹⁹ Ahese asepia mbahe ipi vai iyavei mborerecuareta ivi pipendar osundao reseve-seve. Ahe oñemonuha yuvireco ovava ãgua evocoi cavayu hari pendar rese iyavei isundao rese avei no.

²⁰ Co mbahe ipi vai yipindar vahe soquendasa, oyoya evocoi Tũpa ñehe mombehusar angahu tẽi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tẽi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evo-coiyase co mbahe ipi vai iyavei Tũpa ñehe mombehusar angahu tẽi, ahe opa imombosa secove reseve ipa azufre ocai vahe pipe yuvireco.

21 Ambuae evocoyase evocoi cavayu morochi vahe hari pendar yuru pipe sui osẽ vahe quise pucu pipe opa omano yuvireco. Evocoyase opacatu vırai mbahe rohoguar opa soho pipe oye-mohitaro yuvireco.

20

Mil aravıter resendar ñehesa

1 İpare asepia Tũpa rembiguai ogũeyi vahe ou iva sui ivıciar guasu ipıccucu vahe mboyasar iyavei carena ipo guasu vahe opove vıreco.

2 İpare oipısi mbahe ipı oporomocañi vahe mboi nungar aracahendar, ahe niha Caruguar secıi, Satanás serer vahe; ahe oicuhacua carena pipe mil aravıter rupi imoi.

3 Ahese omombo ivıciar guasu ipıccucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopambopa tẽi iriẽhi ãgua rese acıi osupıtıse voi mil aravıter. Coiye rumo mil aravıter pare, imosesa raimi tẽira.

4 İpare asepia tenda, iharıve setá ava oguapi yuvınoi evocoi oipısi vahe omborerecuasa yuvireco ava upe mbahe rese porandu ãgua. İyavei asepia ava hã evocoi opa vahecuer oyasia ñaca yuvireco Jesús recocuer mombehusa sui tẽi iyavei Tũpa Ñehengagũer mombehusa pipe sui tẽi avei. Ahe ava nomboetei vahe mbahe ipı vai yuvireco; sahanga avei nomboetei yuvireco no; iyavei nomondo ucai vahe avei osıva rese serer yuvireco, opo rese avei. Ahe asepia opa ocuerayevi yuvireco. İpare oporocuai Cristo rese mil aravıter rupi yuvireco.

⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter.

⁶ ¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tūpa upendar ité yuvirecoi! Imoñuviriosa manosa evocoyase chupe ndipo iri eté. Ëgüe ehira rumo ahe Tūpa upe naraño ité pahi yuvirecoira, Cristo upe avei. Ipare mborerecuar yuvirecoira sese mil araviter rupi.

Carugar recopisa

⁷ Acoi osupitise rumo mil araviter cute, ahese Carugar yorasara soquendasa sui.

⁸ Ichui osëra opacatú ava ivi pipendar mbopambopa tēi oico; osëra ivi Gog mbopa tēi ãgua, ivi Magog mbopa tēi ãgua avei. Ipare omonuhara vavasave nara isundao eta. Esepia niha, ahe sehi etepri yuvireco inungar ivi cuhi para guasu popi rupindar.

⁹ Ëgüe ehi yugüeru ati amombri sui, oyerepa tupri Tūpa recua rese yuvireco no, evocoi tecua Jerusalén sembiaisu rese avei. Tūpa rumo ombou tata íva sui, ahe ipipe opa tupri ité osapi.

¹⁰ Carugar evocoyase, ava mbopambopa tēisar, ahe opa imombosa ípa azufre ocai vahe pipe. Aheve acoi opa imombosa mbahe ípi vai iyavei Tūpa ñehe mombehusar angahu tēi vahe avei no. Aheve iparaisura pítu, ari yuvireco apirēhi vaheã.

Tūpa oguapira güendave ava recocuer rese porandu ãgua ari ípa vahe pipe

¹¹ Evocoyase asepia tenda imboeteipri, mo-rochi vahe. Iharive oime ava oguapi vahe oĩ. Sovai ivi iyavei iva opa ocañi tupri tẽi. Ndoyecua iri eté co coti rupi yuvireco.

¹² Ipare asepia omano vahecuer seco ivate vahe, seco mbegüemi vahe avei no opũha yuvinoha Tũpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pipendar mbahe sembiapogüer rese.

¹³ Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatu mbahe sembiapogüer rese porandusa yuvireco chupe no.

¹⁴ Ipare manosa recua opa imondosa tata nungar ipa pipe. Evocoi ipa niha imoñuviriosa manosa.

¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

21

Iva piasu iyavei ivi piasu

¹ Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no.

² Che asepia tecua nimarai vahe, ahe Jerusalén piasu, evocoi ogüeyi vahe Tũpa sui ou. Opacatu imoingatusa tupri vahe, inungar acoi cuña omenda água oyemboetei tupri omevi upe.

³ Ipare asendu ñehesa pĩrata tenda suindar aipo ehi vahe: “Tũpa cũritei oicove ava rehii pãhu rupi

oico. Ahe oicove vaherã ité sese yuvireco yepi, ahe ava evocoyase chupe nara ité yuvirecoira. Ahe teieté niha secoira yuvireco chupe.

⁴ Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira viharẽhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

⁵ Ahese evocoi oguapi vahe tenda harive oĩ, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroya sese” ehi.

⁶ Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tẽira i tecovesa resendar ndasepii vahe pipe.

⁷ Acoi ava oyemoviracua vahe ité mbahe-mbahe tẽi apoẽhi ãgua, ahe oipisira co mbahe opacatu omahera yuvireco. Evocoyase che aicora chupendar ité, ahe evocoyase che rahir ité yuvirecoira.

⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tẽi vahe, ipaye serai vahe, mbahe rahanga mboeteisar tẽi iyavei opacatu ava semiramira tẽi vahe, ahe opara yuviraso ipa nungar azufre ocai pĩrata vahe pipe. Ahe niha imoñuvirio manosa” ehi.

Tecua Jerusalén piasu

⁹ Evocoyase ou ñepei siete Tũpa rembiguai pãhu pendar acoi siete tupri igua rĩru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecuara cuña omenda vahevi ndeu, Ovesami rembirecovi” ehi.

¹⁰ Evocoi che quer nungar pipe Espĩritu osepia uca vahe cheu, che reraso ivĩtri guasu ivate vah-esave. Aheve omboyecua tecua guasu Jerusalén nimarai vahe cheu, ogüeyi vahe Tũpa sui.

¹¹ Ahe tecua sendĩ iteanga Tũpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipĩrerimi vahe rese.

¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepei-pei Tũpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese.

¹³ Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no.

¹⁴ Tecua guasu ãchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tũpa rembiguai oñehe vahe cheu vireco vara oro apopri tecua rãha ãgua, opacatu soquendipi rãha ãgua, ñachisa rãha ãgua avei no.

¹⁶ Tecua guasu pucucuer oyoya tupri ipigüer rese. Evocoyase Tũpa rembiguai osãha tecua guasu ruvichagüer; osãhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pãve tupri ité no.

17 Ipare osãha ñachisa: osãhase ipigüer sesenta y cinco metro tupri. Evocoi Tũpa rembiguai osãha ava rembiporu pipe.

18 Tecua ãchisa ahe ita porañete vahe Jaspe serer vahe apopri; tecua evocoiyase oro pãve tupri, aviye vidrio secose catu vahe.

19 Ñachisa moviracuasa vireco opacatu ambuae ita-ita tẽi iporãnete vahe pãve: yipindar iviracuasa jaspe, imoñuviriosa zafiro, imombosapiisa ágata; imoirungatusa esmeralda;

20 imbopoyandeposa ónice; imoñepei ovasa, cornalina; imoñuvirio ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirio yovaivesa, amatista.

21 Doce tupri vahe oquenda guasu ahe doce tupri mbohír; ñepei-pei oquenda ñepei mbohír sui yapopri. Calle guasu tecua aviter rupindar evocoiyase oro pãve, inungar vidrio yande porẽhi tupri vahe ipipe.

22 Ndasepiai eté evocoi tecua guasu pipe ñepei yepe tũparo. Esepia niha, yande Yar Tũpa mbahe mboavaisarẽhi, Ovesami reseve yuvirecoi aheve.

23 Evocoi tecua guasu ndovireco iri eté ari, yasi güesape ãgua. Esepia niha, Tũpa ité osesape güendigüer pipe, iyavei Ovesami tataendi nungar secoci aheve yuvirecoi vahe upe.

24 Sendigüer osesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru ombahe eta porañete vahe yuvirecoi chupe.

²⁵ Evocoiyase soquendipi nimboyasai chietera ari yacatu rupi. Pĩtu ndipoi chiaveira aheve.

²⁶ Ipare opara aheve ambuae tecua mbahe eta, porañete vahe omoingue yuvireco;

²⁷ ava angaipa viyar rumo, Tũpa remimbotarẽhi oyapo vahe, iporombopa serai vahe, ahe ndoyuviroiquei chietera aheve. Ēgũe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

22

¹ Ipare Tũpa rembiguai omboyecua iai tecovesa resendar cheu, tĩpiu, oyecua tupri, osẽ vahe Tũpa iyavei Ovesami renda porañete vahe sui.

² Calle guasu mbiter rupi oso. Iyavei iai ique yacatu oime ivira tecovesa resendar, iha vahe doce yupaguer rupi ñepe araviter pipe. Iyavei evocoi ivira ro aviye ai ava opacatu rupindar mbogüera água.

³ Ndipoi chietera aheve que mbahe tẽivri pendar. Tũpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco.

⁴ Osepiara sova iyavei virecora serer osiva rese yuvireco.

⁵ Aheve ndipoi chietera pĩtu, iyavei ava aheve yuvirecoi vahe ndosecai chietera tataendi. Ndosecai chiaveira que ari güesape água yuvireco. Esepia niha, yande Yar Tũpa teietẽ osesapera. Ipare ahe ava mborerecuar apirẽhi vahe rã itẽ yuvirecoira sese.

Cõimi etẽ Jesucristo yevi água

⁶ Ipare Tũpa rembiguai aipo ehi cheu: “Co ñehesa supĩ tuprĩ vahe ité, sese iya ité peyeroya. Iyavei yande Yar Tũpa acoi omboyecua tuprĩ vahe mbahe oyesuindar oñehe mombehusar upe, ahe ombou güembiguai iva pendar mbahe omboaviye poyava voi vaherã mboyecua ãgua viroyasareta upe” ehi.

⁷ “¡Ayevi poyava voira curi! ¡Sorivete catura acoi ava viroya vahe ñehesa Tũpa suindar mbahe oime vaherã resendar co cuachiar pĩpe!” ehi.

⁸ Che, Juan, asepia iyavei asendu ité co mbahe. Sendu pare voi, añenopiha evocoi Tũpa rembiguai rovai imboetei ãgua viña.

⁹ Ahe rumo aipo ehiño cheu: “Aní ereñenopiha che rovai. Esepia niha, che Tũpa rembiguai tẽi aico, nde nungar, nde rivireta nungar avei evocoi oñehe vahe Tũpa Ñehengagüer rese yuvireco, iyavei inungar opacatu viroya vahe co cuachiar pĩpendar icuachiapri yuvireco no. Tũpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tũpa suindar mbahe oime vaherã resendar sereco, evocoi icuachiapri cuachiar pĩpe. Esepia niha, ari cõimi secoi imboaviye ãgua.

¹¹ Acoi ava mbahe tẽi aposar, toyapoño mbahe tẽi; iyavei acoi ava seco rai vahe, taseco raiño ité oico; acoi ava seco tuprĩ vahe rumo, ahe toyapoño mbahe tuprĩ oico; iyavei acoi ava Tũpa upe oymondo tuprĩ vahe ité, ahe taseco tuprĩño avei oico chupe” ehi.

¹² “Supi eté ayevi poyavara, iyavei arura mbahe porerecosa ñepi-peí ava rembiapogüer rupi-rupi amondo vaherã chupe.

13 Che aico inungar letra A iyavei Z, yipindar vahe, ipandar vahe avei no; yipive vahe ité apirêhi vaherã” ehi.

14 “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirêhi vahe resendar. Ipípe sui oiquera tecua guasu pípe.

15 Ava rehii ndiporeroyai vahe rumo opitapara ocarve tēi yuvireco, iyavei ava ipaye serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyerogui vahe, iyavei opacatu ava oipota rai vahe oporombopa-mbopa tēi ãgua yepi” ehi.

16 “Che, Jesús, amondo che rembiguai íva pendar mbahe mombehu ãgua opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

17 Espíritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe iñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepi vahe yuvireco.

18 Opacatu acoi ava osendu vahe co ñehesa Tūpa suindar mbahe oime vaheerã resendar icuachiapri co cuachiar pípe yuvireco, ahe chupe, “Peicua catu” ahe. Amove que ava co mbahe resendar omboyeapi iri vahe, ahe chupe Tūpa omboyeapi aveira co cuachiar pípendar mbahe-mbahe tēi imombehupri.

¹⁹ Amove que ava virocua vahe co cuachiar p̄ipe sui ñehesa Tũpa suindar, Tũpa avei evo-coiyase ndoipotai chira chupe co cuachiar p̄ipe imombehupr̄i ivira ha tecovesa resendar rereco ãgua iyavei co tecua maranehi p̄ipe seique ãgua.

²⁰ Acoi co mbahe mombehusar aipo ehi: “Supi eté ayev̄i poyavara” ehi.

Ëgüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Av̄iye, aipo rupive.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files
dated 29 Jan 2022

c27c2d97-c359-59f5-b367-83efb2e33739